

每週經課朗誦經文(巴克禮台語漢字)2013/12/01

共同經課 - 1 以賽亞書二章一節~五節

1 亞摩斯的子以賽亞，所得著論猶大及耶路撒冷的默示。2 到許個日的了後，耶和華殿的山欲建立佇諸個山的頂面，搬(pōaⁿ)過攏總的山嶺；萬國攏欲來歸伊。3 有多多國的百姓欲去，講：來啊，咱上耶和華的山，到雅各的上帝的殿。伊欲用伊的道路教示咱；咱亦欲行伊的路。因為律法欲對錫安出；耶和華的話欲對耶路撒冷傳播。4 伊欲佇列國中來審判，為著多多百姓來解決。in欲將in的刀拍做犁頭，將in的槍拍做鐮仔。此國無抬刀攻擊彼國；in亦無閣學習交戰。5 雅各的家啊，著來！咱著佇耶和華的光明中來行。

共同經課 - 2 詩篇一百二十二篇

1 〔上崎仔的詩，大衛所作的。〕人對我講：咱來去耶和華的厝，我就歡喜。2 耶路撒冷啊，阮的腳倚佇你的門內。3 耶路撒冷受起造，親像連絡整齊的城。4 諸個支派，就是耶和華的支派，照以色列定著的例，上去遐，欲謳嘍耶和華的名。5 因為佇遐設立審判的寶座，就是大衛家的寶座。6 著替耶路撒冷求平安！見若疼你的人的確安樂！7 願你城內平安！願你的宮內安樂！8 因為我的兄弟及同伴的緣故，我欲講：願平安佇你的內面！9 因為耶和華——咱的上帝的厝的緣故，我欲替你求福氣！

共同經課 - 3 羅馬書十三章十一節~十四節

11 按呢生知此個時候就是恁已經著睏醒的時；因為咱得著救，比起頭信的時卡近。12 暝欲過，日時近啦；所以咱著褪去黑暗的所行，來穿光明的戰甲。13 所行著端正，親像佇日時。莫得放縱酒醉，莫得好色邪淫，莫得相爭怨妒；14 著穿主耶穌基督，莫得為著肉體圖謀，致到趁私慾。

共同經課 - 4 馬太福音二十四章三十六節~四十四節

36 「若是論彼日，彼時，人毋知，天使也毋知，子也毋知，獨獨父知若定。37 閣親像挪亞的日，人子的閣來也欲按呢。38 因為大水的代先許個日，人啲飲食嫁娶，到挪亞入大船的日；39 in竟然毋知，到大水到一盡滅in。人子的閣來也欲按呢。40 彼時，欲有二人佇園裡，一個取去，一個放啲。41 二個婦人挨磨，一個取去，一個放啲。42 所以著張持，因為恁毋知恁的主甚麼日欲來。43 家主若知賊甚麼更欲到，伊就張持無容允人挖空伊的厝；這是恁所知。44 所以，恁亦著備辦便，因為恁無拍算的時，人子來啦。」